



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8


Yangia anidakangma :

Tir Yimiyim

tiryimiyim@aolima

tir yimiyim

TAPAK 10



### US Congress-i Biden dak tai tongloksü



### CPL nung Russell-i otsü tase ka yangluogo

VOL. XVIII NO. 316 (ADOK 316) DIMAPUR

AMUNGNÜ (SUNDAY)

LUROI (AUGUST) 29, 2021

₹ 5.00

## ABAM Clean Election Movement (CEM) tenzükogo

**Dimapur, August 28, 2021 (TYO):** August 27, 2021 anongo nung Ao Baptist Arogo Mungdang (ABAM) Clean Election Movement tenzükogo. ABAM Executive Secretary, Rev. Dr. Mar Pongener-i Impur nung "My Vote, My future" omen nung ajemdaker CEM tenzüksü.

"Asenoki ochi mapa inyakdang taku aika ajurutsü akok, saka ajakji asen lima ajungtsü asoshi ta tangatetba nung temolung matemasi ita ochi nungi masetshili" ta Rev. Dr. Mar Pongener-i tayongzükba agüja iba mapa tenzüksü.

Sentong nung ABAM Clean Election Movement Convener Rev. Dr. Noklen-i CEM indang nükjiong aser teinyaktsütem lemsatop.

Külen, ABAM Tir Dr. I. Lolen Imchen den Ao Kaketshir Mungdang aser Mokokchung Town Lanur Telongjem tanishirtemia "iba mapa ya arok shilem lir anungji atsüayonga meli mapang ajak nung külemi tasü ita inyaksü yongya atar" ta ashi.

Iba sentong nung ABAM Clean Election Movement Committee züngsemten den Impur nung aliba nisung 63-i taruba election nung ochishia pei temeden yoka mechii Tsüngrem tsübuba aser ochishir lennir shimtsü tenangzükba agiogo.

ABAM Clean Election Movement nükjiong aser teinyaktsütem :

# Election mapang ochimashi inyakba ajanga asen lima rajang akümba tia nungi nüji tia kati arutsü nükla nung ABAM CEM tenzük.

# CEM ajanga nübortem dang Tsüngrem akhümsübuba aser tetemsü lennir shimtsü angatetdaksütsü.

# CEM-isa Tsüngrem tashi nung Election temenen anema raratsü aser Election tiptema agitsü atema inyaksü.

# ABAM CEM-i election merükteta agitsü sentongtem ayongba nung nisung ajaki ochishia Khristan ayak mesamai yariteptsü tayongzükba agütsü.

## Union Minister Renuka Singh-i Nagaland semdang

**Dimapur, August 28, 2021 (TYO):** August 16, 2021 nü Union Minister of State for Tribal Affairs, Government of India, Renuka Singh-i Ministry of Tribal Affairs ajanga Nagaland sorkar nem teyari agüja inyakba mapatem osang metetpela liasü.

Hotel Japfü, Kohima nung senden amendang Renuka Singh-i Tribal Sub-Scheme, Eklavya Model Residential Schools (EMRS) aser Tribal Research Institute (TRI) maparen meyipa repringshi.

State sorkari August 5, 2019 nung Department of Tribal Affairs tasen tentetba aser Tribal Affairs Department o DUDA ajanga ketdangsüa aruba indang osang Union Minister Renuka dang ashi.

Senden nung mendenji Home Commissioner, Abhijit Sinha, IAS liasü aser ketdangsür aika aden.

Union Minister Renuka-isa Chief Minister, Neiphiu Rio den Cabinet/Advisor kar den ajurutept.

## Tanur kati PUBG asayadang Rs 10 lakh endok

**New Delhi, August 28, 2021 (Agencies):** Mumbai kübok Jogeshwari nung alir arishi küm 16 tain tanur kati PUBG asayadang Rs 10 lakh endok.

Iba atema tsüraburtemi tanubosang arütsü aser iba sülen pa kidang nungi jena ao saka police-i pa Mahakali Caves, Andheri (east) nung lia angu.

Bodbar nikongdang tanubosang tebuti MIDC police station nung FIR benokba sülen iba osang ya temai adok. Tanur asübayong police-i nisung pur aoba ken o ka benok aser bushiteptsü tenzük, ta ketdangsür kati ashi.

Police-i bushisüngdang tenzük asüngdang asüandang

tanubosangji taoba ita nungi PUBG asayatsü tenzük aser pai mobile phone nung asayadang ID aser virtual currency angutsü atema tetsü indang bank account nungi Rs 10 lakh endokba osang angazük.

Tsüraburtemi online ajanga sen agütsüba metetba sülen tanubosang arütsü saka pai tejashi nung shidi ka zülua yutsür ki toktsür jena ao, ta police ketdangsüri ashi.

Osang sangoktsürtem aser technical analysis teyari ajanga Mumbai crime branch team-i tasüngji tanubosang jenoka alidak angu aser counseling agütsüba sülen par tsürabur dangi yok, ta ketdangsürisa ashi.

## COVID-19 Nagaland: 79 dak putet, 66 taneptsü angu

**Kohima, August 28, 2021 (TYO):** Deobarnü Nagaland nung nisung 79 dak COVID-19 aliba putetba züngsema nisung ajak agi 29,920 kümogo aser iba nungi 27,601 taneptsü nguogo.

"Tesüiba ghonda 24 tsüngda nisung 79 dak COVID-19 aliba putet. Parnokji Dimapur nung 43, Kohima nung 24, Tuensang nung 4, Phek nung 3, Wokha nung 2 aser Mokokchung, Mon o Zunheboto nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang COVID-19 puteta alir nisung 66 taneptsü angu. Parnokji Mokokchung

nung 21, Dimapur nung 18, Kohima nung 17, Tuensang nung 6, Longleng nung 3 aser Peren nung 1 lir" ta paisa ashi.

Nagaland nung taneptsü angur ajak agi nisung 27,601 kümogo aser ibaji 92.24% lir, ta Dr Kikon-isa ashi.

Tang nisung 828 anepaludar aser tesüiba ghonda 24 tsüngda COVID-19 agi shiranger asüba osang kecha mali, ta paisa ashi.

"Tang tashi nung COVID-19 alitsü akok ta temolung meleme bilemba sample 316,024 tendangogo. RT-PCR ajanga 106,101, TrueNat ajanga 75,161 aser Rapid Antigen Test ajanga 134,742 tendang" ta Dr Kikon-isa ashi.

"Hokolbar tashi nung nisung 654,498 nem COVID-19 vaccine indang dose 849,664 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline workers 60,848, healthcare workers 15,990, arishi küm 45 ser temapur 192,435 aser arishi küm 18 nungi 44 tsüngda alir 385,225 lir, ta paisa ashi.

"Vaccine agirtem rongnungi nisung 195,166-i dose anaprong agiogo. Parnokji frontline workers 43,909, healthcare workers 12,903, arishi küm 45 ser temapur 113,684 aser arishi küm 18 nungi 14 tsüngda alir 24,670 lir" ta Dr Thurr-isa metetdaksü.

## 2030 tashi nung taintem anepaluba centre aser DDRC lapoktsü

**Kohima, August 28, 2021 (TYO):** Nagaland sorkari district ajak nung community owned old age home day care centres aser District Disability Rehabilitation Centre Current (DDRC) lapoktsü sentong lir.

Iba ya 2030 küm tashi nung inyaksü ta Nagaland SDG Vision 2030 document nung shia lir.

Nagaland nütsüng yongsük (19.75 lakh- 2011 Census) nungi 1.5% shi ka matamabensartem lir aser 7% shi ka arishi küm 60 ser temapurtem lir, ta Vision document nung shia lir.

Loktiliba nung tangar

memenepertem nungdakba peritsütsü atema Department of Social Welfare-i mapa aika inyaksür aser item rongnung Centre sorkar indang sentongtem teimba lir.

Nagaland nung Department of Social Welfare ajanga Indira Gandhi National Old Age Pension Schemes, Indira Gandhi National Disability Pension Schemes, Anganwadi Centers for Integrated Child Development Services, Pradhan Mantri Matru Vandana Yojana aser National Creche Scheme inyaker, ta Vision document nungsa shia lir.

Scheme aika inyak nunga communication, transport aser IT den basic infrastructure junga maliba ajanga nungdakbapur ajak metongjemmer ta Vision Document nungsa shia lir.

Iba jagi state sorkari Department of Social Welfare ajanga 2030 küm tashi nung district shia nung community owned old age homes aser day care centres lapoktsü. Sorkarisa tekolok meshitaki alirtem nem education, training, guidance, welfare aser rehabilitation atema residential care agütsütsü.

## NE nung Health & Wellness Centre 1000 lapoktsü: AYUSH Minister



**Guwahati, August 28, 2021 (Agencies):** Northeast nung National Ayush Mission (NAM) Scheme indang shilem ka ama Health & Wellness Centres (HWC) tasen 1000 lapoktsü ta Union AYUSH minister Sarbananda Sonowal-i Deobarnü metetdaksüogo.

Northeast state tem nungi AYUSH aser health ministers den senden ka amendang Union AYUSH, Ports, Shipping & Waterways Minister Sonowal-i

iba osang metetdaksü.

Northeast nung sobaliba mozütem ajungkettsü atema mapa aika tenzüksü, ta Sonowal-isa ashi.

Iba senden nung Union Minister of State for AYUSH and Women & Child Development, Dr Munjpara Mahendrabhai Kalubhai aser Assam, Nagaland o Sikkim nungi health minister tem aden.

Health & Wellness Centres (HWCs) ya Ayush systems nung ajemdaker lapokba lir. Linük nung HWCs 12,500 tashi lapokogo, ta Sonowal-i metetdaksü.

NAM kübok Northeast nung Ayush dispensary 100 lapoktsü, ta paisa ashi.

Goalpara nung Ayurvedic College tasen lapoktsü atema Rs 70 crore lemmüktsüogo aser

iba nung Ayush medicinal experts-i education aser training agitsü, ta Union minister Sonowal-isa ashi.

Ministry of Ayush-isa Guwahati nung aliba Government Ayurvedic College jenjang temabai ajungketa Centre of Excellence akümtsü atema telemtetba agiogo. Iba atema Rs 10 crore lemmüktsüogo.

Ministry of Ayush-isa Northeast state ajak dang Ayush educational institutions lapoktsü atema tebilembatem agütsütsü metetdaksüogo.

Maneni, Imphal nung aliba National Institute of Bio-resources and Sustainable Development den yaritepa Northeast nung Regional Raw Drug Repository (RRDR) ka lapoktsü.



# Patkai Christian College mesemtetsang taküm otsü saya



August 28,2021 nü Patkai Christian College nung Tuisem A Shishak aser kinungtsü na taküm otsü kaket sayaba mapang tena den tesayur aser kaket zülurtem kar noksa nung angur.

**Dimapur, August 28 (TYO)** : Nagaland nung küm 47 jakdang Naga nunger lanurtem asoshi mangdang tulu yur America nunger teyari agia Liberal Arts College lapoksang, Rev.Dr.Tuisem A.Shishak aser pa kinungtsü Wt.Margaret Anne Shishak na taküm otsü kaket ka tanü Patkai Christian College nung sayaogo.

Iba kaket tenünga " as we know them, The Shishaks" ta agüja lir aser tanga kaketem dang nungi tajungba kaji, iba kaket ya Patkai Christian College nung 1992 küm nungi 1997 tashi azünger , Patkai Alumni purtemi zülua adokba, par tesayur tajung ana otsü kaket lir.

" Küm 24 jakdang Patkai Christian College nung azünger onok WhatsApp

group ka lapok aser iba sülen onok telongjem senden ka aliba mapang, onoki longjemer mapa ana inyaksü lemtet. Kaji, onok rongnung tia maka anojungi apuani aser chirnurtem toktsür aor kibongtem yaritsü aser kaji, Patkai Christian College ajanga onok tajung kümdaktsüba tepela tamaitü aser akhüm agüja Patkai Christian College tenzüksang Rev.Dr. Tuisem A.Shishak aser pa kinungtsü Margaret Anne Shishak na taküm otsü zülutsü lemtetba liasü," ta parnok kaket zülur rongnung Dr.Wt.Petekhrienuo Sorhie-i la menden okila jembidang metetdaksü.

Iba kaket zülutsü atema parnok rongnung Dr.Wb.Lanuchuba Wallingi anir Abenla Aonok, Petekhrienuo

Sorhie aser R.Chumbeno Nguillie nungertem shimtet. Tanü iba kaket sayaba sentong nung kaket zülurtem tenünga jembidang, " iba kaket zülutsüba onoki maongka anguba ya kanga tulu, anungji kanga pelar. Patkai Christian College tenzüksang Rev.Dr.Tuisem Shishak aser kinungtsü Margaret Anne na Tsüngremi nüboritem asoshi shimtetba apuani ka liasü. Tuisem-i Nagaland nung kaketshisatsü metsü tajung proka toktsü aser Margaret-i Nagaland nung kongki tapu balala tema ken atentsü sayu. Tena ya 20th century nung Naga nunger asoshi Education aser Music missionary lir," ta Dr.Wb.Lanuchuba Wallingi metetdaksü.

(Maneni tapak 9 nung...)

# NSACS-i online training sentong ayongzüka agi

**Dimapur, Luroi/August 28 (TYO):** Adolescence Education Programme (AEP) kübok tesayurtem atema online Training sentong ka August 25 aser 27 nü ayongzüka katsüogo. Iba sentong ya Nagaland Board of School Education (NBSE), Kohima, Nagaland den longjemer Nagaland State AIDS Control Society-i ayongzüka agia liasü.

Training ya school tem nung tinlonglong tanurtem tajungba anepalutsü aser parnok nem telemtetba tajung agidaktsüba atema tesayuba agütsüba atema tesayurtem tangatetba aser sempet ajungkettsüba nükjidong nung ayongzüka agi.

Training nung HIV/AIDS aser STI, Growing up & Adolescence Reproductive Sexual Health, Nagaland nung tang HIV jenjang, India nung AEP inyakyim aser tanga state nung inyakyim tajungtem, Mental Health aser Substance Abuse, HIV nokdangtsü atema Life Skills amala onük balala nung tesayuba agüja liasü.

Training sentong nung shisalen agütsürtemji Sonal Walia, Consultant (IEC & MST), NACO, New Delhi; MetevinuoSakhrie, Joint Director (IEC), NSACS; Thejangunuo Theunuo, Dy. Director (IEC) NSACS; AinatoYeptho Dy. Director

(SPM) NSACS aser Chongkoi Khaming, Asst. Director (MM) nunger liasü. Training sentong ya AD (Youth Affairs) NSACS, Puthenhenmei lenisüba nung agi.

Mezüngbuba anogo Secretary, Nagaland Board of School Education, Rangumbuing Nsarangbe-i lokti pelaa agizükba o jembi aser Chairman, Nagaland Board of School Education Asano Sekhose-i tepela anküp o jembia liasü.

Iba training sentong nung Nagaland kübok district ajak nungi High School aser Higher Secondary School tesayur 600 shi-i shilem agiogo.

# Kohima nung Smoke Free District Hq campaign tenzükogogo



KMC Administrator Lanusenla Longkumer-i August 27 nü DC conference hall Kohima nung Mezoma aser Dzuleke yimtsüng nem Tobacco free village certificate agütsüba noksa nung angur.

**Dimapur, Luroi/August 28 (TYO):** "Smoke Free District Headquarters Campaign"

tenzükba sentong den repsema District Tobacco Control Cell indang District Level

Coordination Committee (DLCC) senden ka August 27, 2021 nü Deputy Commissioner, Kohima indang Conference Hall nung agia liasü.

Iba campaign tenzükba sentong nung jembiba mapang Administrator KMC, Lanusenla Longkumer-i ashiba agi, COTPA 2003 indang Section 4 tashi taitba nung mapa küma inyaksü mechi Smoke Free Campaign ya tenzüker, koba ajanga nüburtemi amshiba tesentem nung moko achiba nokdang.

(Maneni tapak 9 nung...)

# NDPP consultative senden ka menogo

**Dimapur, Luroi/August 28 (TYO):** August 28 nü NDPP tir Chingwang Konyak-i anir party lenirtem aser MLA tem State Banquet Hall nung senden ka menogo. Senden nung state dak sendakba onük balala benoka sensaksemogo.

State Chief Minister-i, party tejakleni aotsü atema tasa balala benoka lemsatet aser state nung tang yimden yimsüsüba dak sendakba nung tensa indang rasaa ashi. Paisa, India sorkar aser Naga National Political Groups tem tsüngda tang yimjung asoshi sensaksema aliba indang metetdaksü.

Maneni pai party worker tang dang party indang manifesto nung tenangzüka balala agütsür alibatem ataloktsü atema meranga inyaksü ayongzüka liasü.

Senden nungsa lenirtemi 2021 küm July 20 nü bangzüng agizükba maneni nongita yaritsü aser August 13 nü Dimapur nung NDPP, BJP aser NPF ta party asem longjemer bangzüng ka agizüka ayuba pelashishia agizükba den iba bangzüng maneni pusemstü bangjemogo, ta NDPP Media & Communication Committee sangdong ka ajanga metetdaksü.

# NIIT Dimapur Center-i metetdaksür

**Dimapur, Luroi/August 28 (TYO):** NIIT Dimapur Center sangdong ka ajanga 2019 küm tashi nung NIIT nung computer course balala agirtem dang certification aser tanga maparen balala atema August 31 nü tashi nung office mapang Marwari Patti nung amenoka aliba centre den t o n g t e p r a t e p t s ü metetdaksüogo.

Temetetsü kaji NIIT

kaketshirtemi statute of limitation (SOL) mapang tsüngda service balala agitsü nüngdaker.

"2019 küm tashi nung onok den züngoksemer aliba kaketshirtem atema service balala ya atakzüka aliba mapang tashi nung dang agütsütsü aser iba sülen inyakyim kecha magizüktsü," ta Head of Center Daniel Changkiri-i metetdaksü.

# AH&VS Department-i metetdaksür

**Dimapur, Luroi/August 28 (TYO):** Wara pokteter aliba mapang chiyongtsü agi anünga mesemtsü atema NEC project ajanga Department of Animal Husbandry & Veterinary Services-i state nung pei kima an metsüba jenjang ajungkettsüba atema achaayanga inyakdar.

An metsürtem takhangba peritsütsü atema kanga kara ainba antem Department indang Farm nung metsüdar. September 5 nü nungi ayoktsü aliba tang metsüba aliba antem ya talisa Meluri Sub-Division densema Phek district nung an metsürtem atema asütsü. Kohima, Dimapur & Peren Districts nungi an metsürtem shirnoki taoba mapang iba maongka agiogo, parnoki maparen maneni inyakyonga aotsü atema parnok nüngdakbatem jelia mekazük yutettsü.

Tejangrartemi teküboklen agüja aliba contact tem ajanga office mapang (10 am nungi 1:00 pm) tongteprateptetsü.

Sl. No. District / Sub

division Contact No.

- 1 Meluri 7005035243
- 2 Phek 8413045806
- 3 Peren 8974678993
- 4 Kohima 8638227795
- 5 Dimapur 7085982290

Takhangba dak ajemdaker antem lemtsütsü atema tesem aser mapang lemtsütsü.

### An telemsa vamai alitsü:

- 1. Shi aser entsü atema Fast Growing (FFG) Low Input Technology Bird
- 2. Ita 2-3 tsüngda an seret 2.5 nungi 3.5 tashi atutsü imlar aser küm nung entsü 150-170 tsüngda akotsü imlar
- 3. Tang anogo 31 tain Growers mixed coloured birds angutsü
- 4. An ajak nem vaccine agüjatokogo.
- 5. Ana takaratiba nung aintsü atema "Grower Feed" den chiyongtsü tanüngzük ara agütsütsü ajungshir.
- 6. Online Consultation services aser tanga logistic support tem agütsütsü.

An lemshiba mapang ajaki SOP sülen tashi angaa anidaktsü nüngdaker.

# S.D. Jain Samaj-i V. Hekali Zhimomi (IAS) nem tetushi agütsü

**Dimapur, Luroi/ August 28 (TYO):** S. D. Jain Samaj, Dimapur tir Om Prakash Sethi-i sangdong ka ajanga V. Hekali Zhimomi (IAS) nem tetushi agütsüogo, shiba Department of Health & Family Welfare nung Union Joint Secretary asütsü shimogo.

La ochishir taküm ka aser

kanga bendanga agüja inyakba tesangra ketdangtsür ka lir, shibai la tenzükba wadang ajak nung tsüngsü tajung toktsüogo. La ya tetsürtem atema talisa nükrangdong ka lir, ta paisa ashi.

Maneni Jain samaj-i la wadang tasenba takok nung inyakyonga aotsü imlaja atar, ta tir-isa metetdaksü.



# Assam nung mezüngbuba Covid Sahayata Kendra lapokogo



**Guwahati, August 28, 2021 (Agencies):** Linük kübok state aika nung Covid Sahayata Kendras (CSKs) takok ngua lapokba sülen Assam nunga mezüngbuba Covid Sahayata Kendra (CSK) lapokogo.

Honibarnü Guwahati nung aliba State Capital Dispensary nung CSK lapok.

Covid Sahayata Kendra ya multi-purpose Covid Help Centre ka lir aser iba ya wara indang osang prokshiba den sorkari Covid19 anema inyakba mapa nung yariteptsü atema lir.

Iba ya national level NGO-Child In Need Institute (CINI)-i apiteta lapok. CINI-i taoba

küm 47 tashi health sector nung mapa inyakba arur.

Honibarnü CSK lapokba sentong nung tongti tesemdangerji National Health Mission, Assam Mission Director, Dr. Lakshmanan liasü.

Sentong nungsa Dr. Binita Goswami, joint director (District Health Society); Dr. Ajay Lashkar, in-charge of Capital State Dispensary; Meghendra Banerjee, COP, CINI; Sujoy Roy, Sr. manager, CINI den CINI Assam Unit unit in-charge aser Kamrup health ketdangsürtem aden.

COVID-19 wara adokba sülen CINI-i linük nung meta talang pilar aliba tesemtem

nung mapa inyakba arur.

CINI-isa Pandu aser Golaghat nung CSKs ana lapoktsüba den mobile CSK vans tenzüksü sentong lir.

"Taruba anogo 25 nungi 30 tsüngda Kamrup district ya 100% vaccinated district mezüngbuba asütsü" ta NHM Assam Mission Director Dr. Lakshmanan-ia ashi.

"Kamrup health district ketdangsürtemi Covid atema mapa tajung renemba aser inyakba atema pelar" ta Sujoy Roy-ia ashi.

"State Capital Dispensary aser District Health department ketdangsürtemi kanga junga yariteper" ta paisa ashi.

# Assam-Mizoram arrtsülen ano tensa mejungi kümogo

**Guwahati, August 28, 2021 (Agencies):** Assam-Mizoram arrtsülen tensa tera süngjamba sülen ano tanaben tensa mejungi kümogo.

Cachar district nung aliba Lailapur anasa Khulichara nung tensa raksa. Iba tesem nung Assam-i gari lenmang ka yangluba atema Mizoram ketdangsürtemi ashishitepba ajanga tensa mejungi aküm.

Mizoram tsütsü nungi prangpong amba telok kati Khulichara nung gari lenmang yanglurtem noktang, ta Assam

Police-i ashi.

Tang atema gari lenmang yangluba mapa anena lir aser Cachar SP Ramandeep Kaur, DIG Debojyoti Mukherjee-i anir police telok ka tesem tonga ogo.

"Temaba jenjang nung olemtepdar aser angatetteptsü imlar. Parnoki ground rules alema ano inyakogo aser onok lushii aru" ta SP Kaur-ia ashi.

Assam aser Mizoram police temi iba tesem nung teseptem amenoka lir aser parnok tsüngda mepetmesü

malitsü atema Central forces mapa lezmükja lir.

Assam-i par lushi nung gari lenmang yanglur ta Mizoram-i tai tongloksür.

"Iba tesem nung alirtemi gari lenmang yangluba anema noktak aser onok nem osang sangoktsü. Assam nungeri Mizoram lushi telungi aitba atema onoki mapa inyakba noktang. Onoki tensa tiptema süngjemdaktsütsü meranger" ta Mizoram nung Kolasib district SP Vanlalfaka Ralte-ia ashi.



Tripura yimtiba Agartala nung Union Finance Minister Nirmala Sitharaman-i Tripura Chief Minister Biplab Kumar Deb den ajurutepdang la nem aou agi yangluba handicraft items agütsüba angur. (Agartala, August 28)

# Meghalaya nung Sep 1 nungi shisaliok rejutem lapoktsü

**Shillong, August 28, 2021 (Agencies):** Meghalaya sorkari Hokolbarnü Standard Operating Procedure (SOP) tasen ka metetdaksüogo aser iba nung September 1, 2021 nungi shisaliok rejutem tanaben lapoktsü shia lir.

Ajisüaka, shisaliok rejutemji education department-i latettsüba SoP sülen anidaka lapoktsüla.

SoP tasen nung Centre aser state sorkar office tem 100% attendance alitsü aser anogoshia nikongdang 5:00 ako nung shibangtsü shia lir.

Maneni, Banks aser Post

offices nung 100% attendance lia lapoktsü akok aser anogoshia nikongdang 5:00 ako nung shibangtsü.

"Inter-District senzüsenbongba melar" ta Meghalaya chief secretary MS Rao-i tetuyuba agütsüba nung shia lir.

Ajisüaka, East Khasi Hills district nung commercial vehicles senzütsü atema deputy commissioner-i latettsü ta paisa ashi.

Tourism department-i latetba SoP ama local, domestic aser international tourists atema tourism tanaben lapokshitsü.

# Darrang Police-i mozü shibelener ka apu



**Mangaldai, August 28, 2021 (Agencies):** Darrang Police-i Hokolbar aonung ki ka mita aodang mozü shibelener ka apu.

Parnoki Baraujhar nung asür Gafa Sheikh'er jabaso Abdul Jabbar (32) apu. Iba mapang pa ket nungi heroin gram 17 bena lia apu.

Iba dak sendakba nung Narcotic Drugs and Psychotropic Substances (NDPS) Act, 1985 kübok ken

o ka benokogo aser okadaki pa police ket nung ayutsü temelaba agütsü, ta Darrang superintendent of police Sushanta Biswa Sarma-ia ashi.

August 13, 2021 nü Darrang Police-i Rashid Ali'er ki mita aodang brown sugar/heroin enokba vials 65 ngutet ta metetdakja liasü.

August 2, 2021 nü Darrang Police-isa Azad Ali'er ki mita aodang heroin gram 1.23 ngutet ta osang sangoktsü.

# Guwahati Municipal Corporation nung mapa inyaker 40 anentsüogo

**Guwahati, August 28, 2021 (Agencies):** Guwahati Municipal Corporation (GMC) nung ozüing alema mapa nung shimoker nisung 40 tashi anentsüogo.

GMC nung daily wage employees (DWE) 40 tashi mapa nungi anentsür ta GMC commissioner Devashish Sharma-ia August 25, 2021 nü sangdong ka nung ashi.

Osang angazükba agi DWEs

40 ji advertisement magütsüi GMC nung shimokba liasü.

Fact-Finding Committee kati osang bushitetba nung ajemdaker parnok mapa nungi anentsü.

Parnok ya taoba GMC commissioner Debajit Hazarika inyakba mapang shimokba liasü.

Ajisüaka, GMC mesüra sorkari iba ochimashi inyakym nung shilem agiba ketdangsürtem dang kecha mashi lir.

# Tripura nung BJP züngsemtemi TMC kaketshir züngsemtem amak

**Guwahati, August 28, 2021 (Agencies):** Tripura nung BJP züngsemtemi Trinamool Congress nung lanur züngsemtem amak.

"August 28 nü TMCP Foundation Day amongtsü atema mapa inyakba lia Tripura nung BJP züngsemtemi amak" ta Trinamool Chatra Parishad indang vice president, Supdipta Raha-ia ashi.

TMC MP aser party lennir Abhishek Banerjee-ia Tripura nung Agartala-i aodang pa indang convoy amak.

Abhishek-i pa indang social media nung video ka sayu aser BJP-i iba mapa inyak ta tai

tongloksü.

"BJP yimsüsüba kübok Tripura nung democracy. Chief Minister Biplab Deb-i state temaba jenjangji anir atuba atema kanga junger" ta pai ashi.

Ano, Tripura nung Trinamool Congress lennirtemi kaketshir züngsem Solanki Sengupta Maharaja Bir Bikram College nungi pur ao ta tai tongloksüogo.

Parnoki East Agartala police station-i ao dak FIR magizük ta TMC youth wing-i ashi.

Parnoki Solanki aliba tesem bushiteta ao saka police lia ABVP züngsemtemi parnok noktang ta TMC youth wing-isa metetdaksü.





# TIR YIMYIM

## YIMOBILEM (EDITORIAL)

DIMAPUR AMUNGNÜ LUROI (AUGUST) 29, 2021

### Tatidang akoktsüba tashi

**A**sen taküm nung kodang Yisu Khristaji kibur aser kumttdakba ta agizüka, Pa sülen jajatsü tenzükdir, tatidangji arutsübasä, anungji Yisu Khrista alima nung alidanga Pai Pa nüsüngtem dang tatidang nung metsüksü kümdangdaksüba asenoki Laishiba nung azünger. Iba amaji jakdaka kümdangshidaksüyonga Par nüsüngtemi tatidang makokba asenoki meteta lir. Atangji, tatidangji asenok dangi dang masü saka Yisu alima nung Pa mapa tenzüksü asoshi lumia sarasademtsü tenzükba mapang nunga Pa dangi tatidang asem aruba asenoki Mathi tapu 4 nung angur. Ajisüaka, Pabo item tatidangtem nungi metsük. Asenoki kodang Yisu Khrista atidanga mapang aser Pai tatidang akokba tashi indangji jungjunga reprangdanga angatetsü merangdir, iba jagi asenok nem tanüla tangatetba tajung ka agütsütsü aser asenok dangi aruba tatidangtem akoktsüba tashi tasen angutsü. Aji oda, kodang asenoki Yisu dangi aruba tatidang asem indangji shisadangdir, mezüngbuba Satan-i pa atidangbaji Pa ain amshia long agi chiyongtsü kümdaktsütsübaaji liasü. Kechiba chiyongtsü agiang Satani Yisu atidang ta bilemdangra, iba mapang ya Yisu anogo 40 aser 40 aonung lumir kanga yaseta aliba mapang ka liasü. Lumiba mapang asünungji chiyongtsü chinüa alitsü südi ta Satani bilem südi. Ajisüaka, Yisui Tsüngrem o agidang langzü, kechiyong nisung taküm alitsübaaji chiyongtsü kija agi taküm alitsü makok. Chiyongtsü ki sünga akayonga tachi mejungra koda ? Aji oda, shitakba nisung taküm aliba yabo chiyongtsü agi masü Tsüngremi ashiba o anga nung dang taküm alir ta Satan nema dena angattdaktsütsü merangba asenoki angur. Ashiko, asenok asübo haito, ya mapang tajunga to ta ser long agi chiyongtsü kümdaktsür tebok sünga chiyongtsüang bilemla. Iba tatidang den kodang asenoki ajuruba tatidangtem medemdangdir, asenoki election mapang ajuruba tatidangang mesük. Asenok sensaker, anungji teti medokmeperi agi sünga alir. Iba mapang asen vote alidi ta arur, atangji tayoktsüa kecha maka sensaka aliba mapang nung vote alidi ta aruba tatidangji tuluka, anungji asenoki makoker aser yoka adoker. Mesüra asenok timtem nung alidang ochimashi tilaka inyak nungbo timtemji akoktsü amai tatidang arur, idangji asenokbo tsükadoker, kechiyong asenok Tsüngrem o nung main, iba jagi tatidangji makoker. Tanabuba tatidangjibo, Satania dena Tsüngrem o agi anar, na yang nungi pongokang, kechiyong kotak tenyartemi na kümzüksü ta zülua lir ta ashiba asenoki angur. Ajisüaka, Yisua Tsüngrem o agidang nai Kibuba nü Tsüngrem tatidang ta ashiba angur. Iba tiaji kodang bilemdangdir, asenok asübo hau na, Laishiba nunga yamaji zülua lirji ta ser tamang agi pongokla. Ajisüaka, ibaji tamang masü saka asenoki bilemba ka dang asütsü, kechiyong Satani ashi angaba nung asenok tamang tendangtsü makok. Tanüa asenok rongnung Laishiba tapu aser tekong amshia tamangertem mashileni anitsü purtem aika adokdagi. Item dangji asenoki Kibuba nü Tsüngrem tatidang ta shitettsüla. Tasembuba tatidangji, shi nung bilemstsübo jangratemtsüka, kechiyong Tsüngrem masü saka Satan-ang khen külem nung idangjisa tashi tulu akaba yimsüsür kümer alitsü. Ibajia kodang asen tensa den medemdangdir, election nung takok ngunüra sen, yi, drugs aser raraba hadir bendenang aser itemji nisungtem nem agütsür tashiyim amshia raratepdakjang, nungdak süra nisunga süjang, yamaji nai inyaktetra na yimsüsür kümogo ta Satan agi nisung kümer arua ajungshiba mesüka lir. Asenok asoshiho kechi shitak aser kechi tai kecha mali, Tsüngremi mulungba asü masü ta bilemdangtsüa mali, takok ngura ojang ta asüba nung asenoki Satan-i ashiba angar. Shitakba nunga asenok karbo election nung takok ngunüba agi Satan tashi ain bushia mamangba purtem tekülemdak bushia jajar. Idak nung jagi ainji yin nung enoker temang nung mesülöker senzür. Ajisüaka, Yisui Satan dang ashi ama, Kibuba Tsüngremji ka dang lir, anungji Paji dang külemtsü ta shitettsüla. Item telangzüba ajakji Yisui Laishiba nungi agiteta Satan dang ashiba aser arütsüba asenoki angur. Yisua dena Laishiba bushi aser temulungjang nung ayu. Pa atema tatidang akoktsüba hadir tajungtibaji Laishiba nung zülua aliba Tsüngrem o ji liasü. Iba denji kodang asenok Khristan taküm aser tamang medemdangdir, asenokibo Laishibaa mebushir aser sarasadema masür, iba jagi tatidang aru maruka tsükadoker. Ajisüaka, asenok dangi tatidang aru shia asenoki Laishiba nung ya zülua lir ta Tsüngrem o shitettsüsa asen tamang renema lira, tatidang akoktsüba tashiji yang nung jagi arutsü.

## OLEMSABANG

### Asenok Naga Nunger Asoshi/Atema Yimya Tasen Ka Benshiyonga Aotsüba Ya Kanga Tasak Ta Bilemer

R. Imkong Lkr, Mangimen.

Asenok Naga nunger asoshi/atema "soka rodi" "Dry Bread" made out of Atta aser Moita flour" achiba ya yimya tasen ka lir, kechiba ta süra asen naga nungertemi "Soka Rodi" ya asen Detsü aser Teboutem mapang nungi chia maru ta tamasa angattdi. Asenoki iba "Soka Rodi" ya tanübo aikati sapua achir, saka tamasa yongi yimya sübaa chia maru nungji iba chiyungtsü ya jenjang makaba oset chiyungtsü ka ama asenoki chia ajemer. Saka Tsümartemibo iba chiyungtsü ya tongtibangba chiyungtsü ka kümdaktsür liyonga aru aser yamajisa liyonga odagi, saka asen Naga nungertemi iba chiyungtsü ya asen Detsü aser Teboutem "our fore father and mother" mapang nungi chia jema maru nungji chi melena Rodi ya aibenbo mechteter. Aji saka asen Naga nungertimbo chi chiyungtang She mesüra Ango temelang tilakabosa enokerang chiyunga jema aruba ngua arudagi. Aser ano asen Naga nungertem rongnunga karibo chi chiyungtang She "saka shi ta mamshitsüla" mesüra Ango tu aousu sünga arangoka yur asentzü sena yima jangratema chiyungba angur.

Asenok Naga nungertem aikati alu yima aru aser balakata asenok Aortemi alu ayimjang timtem jenti arema min-kishi lushe "forest land" "jungle in Hindi" tululu chia aru aser ibaji arudaktsüdang "let it dried" ita ana asem tashi doktsür kelen yangji mi senoka arunger, aser aluji merükteter kelen, alu nungji mettsü yoker "seeding" aser mo lanu adokba mapang nungi meyi "summer time" tepiyong asenoki modang o ayi na bendang kanga meranga inyaker, aser tatem nung Alu mena akadang "already ripen" tsükji ruzüka netzüker kelen kidangi bener adoker, aser tsükji pakti "mat" tulu aser talang ka nung anü nem pudaka doktsür, aser anü tatsük jagi kodang temsüa mena kümdir aji loketa molok tulu kar nung ayur aser aji jungjunga mokonga kümdaktsür kelen semki nung dokoka "Ale" süngja mesükba süng talang ka agi tsükji teküb jungjunga aludakja asener, aser aji agiteta tetsürtemi per agi liteter "a small flat mat in which rice and husk are seperated" aser iba nungjagi jang temesüng adokdaksür kelen aji asenoki chipo nung sorujoka chia jema aru. Saka tanü asen putu mapang nungbo tejen yimyatem tu ajak doktsür kelen "machine aser kol" agi tsük nungi jang temesüng küma adokdaksür kelen soruhoka chia jema takümtem liyonga odagi.

Saka tanü mapangbo asenoki tsümar jilo benshia Atta aser Moita agi Amtsük "Rodi" wanga chiteper. Iba yimya ya asenok Naga nunger asoshi/atema chiyungtsü tasen ka chia jema odagi, yimya agi asen Naga nungertemi anepdang süale mesüra aonung süale pei pei kidang she mesüra ango mesüra ano tanga aoun tajung ka den chi jangratema chiyunger kelen azünga alitang karibo pei medemer kidangi kazüyonga aor, item medemertem ya asen nisung asütsü akok mesüra tsümar kar asütsü akok, idangji par yimya amatu kar kibong nung chi chiyunga alitsü akok mesüra kar kibong nungbo chi melena Aoun teronem menema sur, soka rodi talem wanga aliba den jangratema chia jemasa denjir. Yimya agi tsümartemi balaka aiben tang soka rodi achir asünungji par kinüngertem yari soka rodi süale, aoun süale jungjunga awazüa yanglua yur chia jema altiag kisemertem tu aruasa denji, aser kibur jagi yimya tajung sayua kisemer dangji nenok-a chidangang ni? tasa asüngdang, idangi kisemertem jagi ashir, neriang agütsürbo chidangtsüa tu ta langzürji to par kibong akaba nungjagi tesadang ka agiteta agütsütsüsa akümer, idangjibo kibur atema rodi aser aoun tu manünger, aser kisemertem jagi rodi aser aoun tu chizüker kelen ashir, nenoki yangluba amtsük aser aoun ya khen agi balaka jungasa yangluteter, anungji tarutsü mapangtem nunga yamaisa chinüale ta shir oatoker. Iba anogoji kibur tu tebok mesüngi pei mapai aor, saka tebok mesüngi mapai aor asünung mapa majeter aser aonung yaseta kidangi shilanger. Aser ano aonunga khen khenbo kisemertem tu yamatusa arua denjir aser kasatusa ataloker, aser pei yipdeni tebok mesüngi aier, aser aonung ayaterm atongdangbo yaseta aiter aser amoi junga moi anepdang sangwatsü yongyaa atar. Aser ano mapang kabo kisemertem tu ki kbur dang nungia nübu tu timba aruasa denjir, iba mapang nungjia kibur tu kisemer dangji ashi majung kangasa tim atemer ta angattdi. Yangi ano tetisa atalokba o kaji asen nisungi asen kidangi kisemi arudang chiyunga denjira idangjia kisemertem dangji nenok-a chi chiyungangang ni? ta asüngdangra maa tasa ashir, kechiba ta süra pei kidang chi tebok sünga chiyugner arua atar, ashe iba mapangjia tanga chiyungtsü tasen ka chidangang ni ta ka ashir asünungbo maa tabo mashitsü ta bilemstsür. Yangi iba yimya ya kar atema balaka mejembir, saka asenok ajak dak aketba yimya ka indang terabo melenshi nung jungdi sü ta shidanger. Kechiba ta süra yimya awashi memetetera item dangji koda ser "advance" kin ta ajatsü, saka kodang kari asen yimyaji mejungi reprangteter "backward" ta shira idangjibo manganüi akümer.

Khen mapang ka "Hajera walla" "Daily bread earner" kati kenü anogo pai hajera or arudang pai atetba sen nung jagi leman nung meyipa pi ki bushia arudang bazaar nung metsü mersü tera ali, peas, pengana, alo aser totzü tera-a ali, iba denji she seret ka ali, aser tanüngba sen nung jagi atta aser moita meyoktepa seret 3 (asem) alir kidangi shilanger. Kodang pa ki atong, pai par tantsü tu aja aser ashir, item chiyungtsü ya asüng deobar anogo amongdang achitsü atema bener arua lir he, nai-a reprangdangang ma, ni tanü hajera aoba sen ajak agi item ansotsü chiyungtsü osettem aliogo no. Idangji par tantsü-i ashir, nai asüng Deobar anogo amongdang achitsü aser ajemtsü atema kechisarena abensaa apiteta alia bener arutsüji kangasa pealar ati, oda asüng Deobar anogo amongdang asen kidangi tetibo marudangba medemertem karbosa asen ki semdang-a kuti, idangji ana ket nung item chiyungtsütsem alia yua karji ana maak masütsüago ta shia liasü. Tasüngnep Deobar anepdangji yakta saaker tamasa süngo molua ajem, iba sülen tu chi sürua aoun takaba ka sua chiyunger kelen tatsüka kazüa alitang, par aki medemertem tu terok tashi par tu jashia aru, aser kodang parnok tu ajurutep, parnok ajak saalemtepa jungasa lidar südi ta jembiteper kelen, parnok ashir, tanübo Deobar anogo asünungji asen aki medemer ki tu semdangji odi ta ser ayongtper aru ago ta shia liasü, idangji kinüngtsü tena jagi ashi, nenoki ozü ki semdangbaji kanga pelar ago ta shai liasü. Parnok ya par pezübo Aor chanusa aser anabo Moyar chanu liasü.

(Maneni asüng adok nung angutsü...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



# Center Point Arogo nung pastor, Tim Covid tashidak agi asü



Pastor, Tim Parsons

**August 28, 2021:** Kentucky nung aliba pastor ka dak coronavirus tashidak putetba sülen hopta ana tsüingda süadokogo; par Arogoi mapang talangka pa atema sarasademja aru.

Brihostibarnü Lexington nung aliba Center Point Church-i Facebook post ka ajanga par Arogo nung pastor, Tim Parsons asüba osang metetdaksü.

Arogoi sangdong ka ajanga, "Onoki meima aliba Pastor, Tim Parsons asüba atema onoki jashia mangyimer. Nisung aikati pa kanga meima liasü aser nisung meyrjang aika melungjang nung pa alitsü. Tangbo pa, pai kanga meima aliba Kibuba den lir ta amanga onok pelar," ta metetdaksü.

August 9, 2021 nü Parsons dak coronavirus putetba sülen pa kanga kera temang tamajungba küma hospital-i anir ao. Arogoi taoba hopta nunga online ajanga sentong ka ayongzüka pastor atema sarasademja liasü.

Arogoi mapang telatet kecha makai pastor atema lumia sarasadem tenzüka sülen anogo ka dang lirbo pastor süadok. Pastor-i kinüngtsü, Susan den tanur asem toktsür pilaogo.

Brihostibarnü Arogo lenirtem aser züngsem aika Tenla kidang adenshia parnok tsüingda melung

süneptsütepa liasü.

2005 küm September ita nung Parsons leniba nung Lexington nung Center Point Arogo tenteta liasü, aser iba mapang nungjagi tenzüka Arogo nung nisung noklang aika tzü nung Baptia züngsem aküm.

Cedarville University, Ohio nung Center for Biblical Apologetics & Public Christianity founder Director aser taoba mapang Southern Baptist Theological Seminary vice-president, Dan DeWitt-i, Parsons ya nisung aika ajungmesotetba professor ka liasü, ta ashi.

Dan-i Facebook Post ka ajanga, "Ni undergraduate asüba mapang nung ozü tesayurtem rongnung 'ni mesaklokba' ta ni bilemba tesayur kati (Parsons) kü dang 'lenisütsü atema Tsüngremi nü nem maongka agüja lir' ta ashi, aser pai kü den kü taküm indang lemsatetpa liasü," ta metetdaksü.

"Iba mapang nungjisa ni ajungmeso aser ni mangdang ayu. Iba mapang nungjagi tenzüka küm aika Tim Parsons-i ni ajungmesoa aruogo. Covid tashidak den raraba sülen tangbo Pa Yisu den alitsü atema ogo. Ajisüaka pai pa taküm kanga junga litetogo. Pastor Tim atema Tsüngrem dang pelar.

Kodak nung aliba Oba, yimlibilema par kibong aser Arogo den liang," ta paisa lemsatetp.

Dan-isa par kaketshirtem dang Labor Day matong tashi pai Zoom ajangadang class agitsü, ta metetdaksü.

Pai twitter ajanga kaketshirtem dang, "Campus nung coronavirus tali putetba nung ajemdaker ni Labor Day matong tashi Zoom ajangadang class ajak agitsü. Kaketshirtem, wara nungi kümzüka liangma," ta metetdaksü.

## ANOGO ABEN TSÜNGREM DEN

### Temetongshiba agizükbaji takok sapi

"Shibaisa temetongshiba meimer pai shisatsü meimer, saka tartsüba semparji tamachi". A. Shin 12:1

Lanuwa mapang yimtak LPS zünga alidang kü tesayur kati mapang shia kü nem tsüngi o agütsüba tanua bilemteter.

Talisa mulungjang nungi kodanga mamatetba o kaji "tamasa nai sen tebushi, saka temetetba shisatsü (Education) bushiang, süra nai idakji rongsen, konang aser tetushi angutsü".

Atangji ibaji kanga dang shitak lir. Tanü tashi liyonga arudang tajangshibatem nungi angateter.

Solomon shisa akasangi shisa tarok jenti agütsüba rongnung"shibai temetongshiba mesüra tsüngi o meimer, pai shisatsü meimer" ta ashiba yaa ka ta züngshir.

Nisung shibai tangar nungi temetongshiba agizüker pai/lai pei taküm nungi rema maoba senti rongsen bendenba mesüka alitsü, kechiaser temetongshiba agütsür kati kodanga tamajung atema masü saka tagizüksang asoshi ibaji tajangzük aketba aser temaotsü lir.

Tsüngremi kodanga asenok nem tamasa temerenshi magütsür, saka asenok taküm nung tajangzük asoshi temetongshiba agütsür. Pai meima metongshitsüba agizüker ka süa iba lenmang nung teti anitaktetba taküm ka ka alitsü ajungshir.

#### SARASADEM

Kibuba Tsüngrem, Nai metongshitsüba angateta benshir taküm ka ni kümjangma. Amen

## ICC-i Khristan ajak dang Afghanistan atema sarasademtsü mepishir

**August 28, 2021:** Brihostibarnü Afghanistan yimtiba, Kabul nung bomb lendong nung nisung aika asüba sülen tensa ano tamajungba kümogo; iba dak sendakba nung International Christian Concern (ICC)-i alima tesem ajaklen Khristantem dang Afghanistan tensa atema sarasademjang, ta mepishia metetdaksü.

Tensa tamajungba akümba sülen nisung aikati Afghan nunger Khristantem densema lendong nung alir Afghan nungertem koma kümzüksü, ta shisabulutsür.

August 26 nü Airport anasa Abby Gate aser Baron Hotel nung bomb lendong agütsüba ajanga US sepai 13 densema nisung 170 shi süogo. Iba lendong nung US sepaitem, Afghan nungertem aser tanurtem aika süogo. ISIS-i iba lendong agütsüba nangzükogo.

Osangbener den jembidang Harvest Arogo nung pastor, Greg Laurie-i, "Afghan nunger lendong nungi kümzükang ta onoki sarasademtsüdar, aser US sorkaria tekaraba nung asalentong yanglua inyaktsü onoki imlar," ta metetdaksü.

ICC Tir, Jeff King-i, "Bomb lendong agütsüba ajanga kiralongrar teloktemi Afghan nunger, Khristantem aser tangartem dak taochi maliba kuli sayur. Taliban teloki Afghanistan aser airport nung tensa raksatsür aser ISIS ya ano tang tamajungba kümogo," ta ashi.

Bomb lendong agütsüba ajanga Afghan nunger Khristantem kümzükba maparen nung tetsükdatsü agütsüogo. Iba linük nung Taliban aser ISIS napronglai Khristantem anema inyaktsü, ta aikati tsübua bilemer.

## Afghan Khristantem densema nisung 5,100 kümzükogo: Glenn Beck



Tan hopta Narazene Fund-i kümzükba Afghan Khristantem aser tangartem tayimtsüi ayaketdang tangokba noksa nung angur.

**August 28, 2021:** Mercury Radio Arts CEO, Glenn Beck-i, nijai sponsor süa kümzükba mission ka kübok Afghan nunger Khristantem aser Afghanistan nung lendong ajurutsüsa alir 5,100 kümzükogo, ta metetdaksü.

Blaze presenter, Glenn-i senotsü bushiba campaign ka tenzüka US dollar million 30 bendenteta liasü aser iba senji ajanga tayimtsü aika achaayanga Khristantem aser tangartem kümzük. Reshikangshi tia nung aliba Khristantem atema inyakba telok- Nazarene Fund-i iba mission mapa nung yaritepa liasü.

Afghanistan nungi Khristantem kümzüksü nükjidong nung iba mission tenzük, ajisüaka lendong ajurutsüsa alir tangartema aika

kümzükogo.

Tan ita tomlen US sepaitem aika Afghanistan nungi ainshiba sülen Brihostibarnü Kabul airport kima nung kiralongrartemi pei taküm tenla agüja bomb ana pokdaksüba lendong nung US sepai 13 densema nisung 170 shi süogo.

Glenn Beck-i, "Onoki yangji (Afghanistan) anünga alirtem mamadoktsü. Yangji onok mission tasakba aser lendong tuluba akümer. Onoki kümzükba refugee temji mejangjaba linük ka nung jenokdaksüogo," ta metetdaksü.

"Onok ano teinyaktsü mapa aika lir, kechiyong tang refugees 5,100 linük ka nung jenokdakja lir, aser parnokji shirnoki agizüksü? ta parnok shisabuludar. Saka tia maka

America-ibo magizüksü," ta paisa metetdaksü.

"Tsüngremi refugee tem moajang, parnok agizükba linüktem moajang aser par linük anepjang. Item refugees ya nisung tajungertem aser Tsüngrem tenzükertem lir, anungji nibo ni Khristan ka ta ashitsü aaker," ta paisa shisem.

Nazarene Fund nung CEO, Tim Ballard-i, "Nisung aika kümzükogo, saka anünga toktsübatem atema ni aria bilemstsür. Parnok rongnung Khristantema densema lir," ta metetdaksü.

"Item Khristantemji America sensotem masü. Asenok (America nunger) yangji küm 20 tashi liasü aser asenoki parnok dang aika nangzük, saka tangbo toktsür aoer," ta paisa shisem.



OLONG PAITEP # 5920

Grid for Olong Paitep # 5920 with numbers 1-16 and shaded cells.

TIPILEN

- 1. Nok agi shi alep - (5)
3. Yong-i atakba lempak - (5)
7. Aoksa reprang - (6)
8. Te \_ \_ \_ et - (3)
9. Ajurunüa ---- - (9)
10. Pentok lu - (3)
14. Lendong nungi jenbu - (6)
15. Temang junga aliba - (5)
16. Lokti menjendi - (5)

LANGTSÜNGLEN

- 1. Peria - (5)
2. Tai inyak - (7)
4. Teptsü - (4)
5. Kotak \_ \_ \_ \_ \_ - (6)
6. Asa \_ \_ \_ ang - (3)
8. Taruba küm - (7)
9. Tamendak - (6)
11. Kibong yongsük - (5)
12. Kümsetta ao - (4)
13. Mesük - (3)

OLONG PAITEP # 5919 TELANGZÜBA

TIPILEN :

- 1. Lemsä, 3. Osang, 5. Mezüng,
6. Agi, 7. Süra, 8. Tebutem,
9. Amen, 12. Odi, 13. Asayar,
14. Angsü, 15. Agima.

LANGTSÜNGLEN :

- 1. Lamem, 2. Sangken, 3. Omen,
4. Asüküm, 7. Sendong, 8. Tejang,
10. Tanga, 11. Tazü.

KOMA SÜLA TELANGZÜBA

Q. Tetsür o tetsür na aser tebur o tebur na apuani kümer aliba kibong arogo nung züngsem kümdaktsü nunga koma süla ?

Tetenzük nung Tsüngremi anung aser alima poktetdaktsü. Aji sur kichisurna ajak renemer, Pai aji junger ta ajetet. Lipok 1:27,28 nung Tsüngremi nisung Pa mesukba nung tetsür aser tebur yanglu aser moaja ashi soyapokya-ang aser jendi rena alimaji sungdakjang. Ano Efesa 5:31 nunga tebur pei tebo aser tetsü toktsütsü aser pei kinungtsü den temolung toka alitsü aser tenaprongla shi ka dang akumtsü . Aji dang masu Aorji sobaliba temzung ozung takang ka kubok aliba kin ka lir . Atsü Apong Sa suaka melempotsü pur lempoba ,mesura kin kidong aliba yamala dangji yimteni senchi tulu achi, karbo yimtak nungia aritok aser item nisungtemji yimten Arogo kicha nunga zungoka shilem makidaktsür. Anungji Tsüngrem o nung amendaker akumba Arogo ka nung tebur o tebur na mesura tetsür o tetsür na apuani kumer khristar Arogo ka nung zungsem kuma alitsüji kenyongi tamakoktsü. - I K Dmr.

Tetsür o tetsür na aser tebur o tebur na apuani küma alitsüji khenyongi Tsüngremia memolunger kechiaser lipok kakat nung mezüng Adam yanglu aser pa den alitsü asoshi Eva tetsür yanglu. Tanga linük kar nungbo tetsür o tebur na aser tebur o tebur na apuani kümer lia alitsüa amok saka asenok Naga nungerbo yamajibo toktsür kidong kasa apuani küma alir nunga sünga yimdak melidaktsüi meindoker yamaji asen Aor dang masü Naga nungerbo sobaliba nung kanga talang kin lir. Anungji Arogo nung züngsem jibo toktsür yimtena yimdak nungi dang masü yimlushi adena meindoker. Iba ama ozüng tesashi asen Naga nunger sobaliba temzung kar kü tebilemba shidanger.

- T. Ao, SMS Mokochung

Tanü Putu tensa apira yimden , arogo aser nütüng nüpur ajak yimli aser tenüla jenjang samar sen aser rongsen dak dang repranga amanger asünungji, parnok amala tatetsü kipongtemjia züngsem kümdaktsütsü kecha tasak mali. Akümtsübasä. Kechiyong parnok amala münentsü/tatetsü? kipongtemiang tongpu apua sen o ts? aser nüngdakba rongsen teimba yimden aser Arogo nung contribute asütsü nung koda. ~WhatsApp

(Maneni tapak 9 nung...)

AO OSHI ANGAZÜKDAK:

TANÜ ANGAZÜKTSÜBA OJANG



Kukua

(adj) kanga jashir (bitterly feel)
\* Aseni meimba purtem alima nungi piladang kukua mang ayimer.

Kukur

(n) kanga taku (extremely bitter)
\* Kora aon nung tasentsü meinokra kukur asütsü.

NAI-A YA METETTER MA?

Taoba mapang August 29 nü atalokba kar:

- 1178 - Anti-Pope Callistus III-i Alexander III nem pope title agütsü.
1484 - Giovanni Battista Cibo, Pope Innocent VIII ama shim.
1640 - English King Charles I-i Scotland den peace treaty ka sign asü.
1842 - Great Britain aser China na tsüngda 'Treaty of Nanking' sign asü.
1898 - Goodyear Tire company ngutet.
1952 - New York nung "The Miracle of Our Lady of Fatima" saya.
1954 - San Francisco International Airport (SFO) lapok.
1958 - Cliff Richard aser Drifters ajanga "Move It" kensep saya.
1977 - Iggy Pop aser David Bowie indang "Lust for Life" kensep saya.
1978 - Flushing NY nung USTA National Tennis Center lapok.
2001 - 58th Venice Film Festival: Mira Nair-i direct asüba "Monsoon Wedding" ajanga Golden Lion takok angu.
2002 - 19th MTV Video Music Awards: Eminem aser Pink nati award angu.
2009 - Cristiano Ronaldo-i Real Madrid atema mezüng asaya.

TANÜBO NAI LANGZÜANG

Q. Indian Film Festival of Melbourne Awards nung actor shibai Best Performance Male (Feature) award angu?

- A. Suriya Sivakumar B. Vijay Sethupathi
C. Kamal Hasaan D. Rajni Kanth

(Taruba adok nung onoki langzüksü)

YASHIADOK TELANGZÜBA: 3 Years

SUDOKU # 5961

TELANGZÜBA # 5960

Sudoku grid for #5961 and Telangzuba grid for #5960.

OJANG LUTEP # 5506

Word search grid for Ojang Lutep #5506.

OJANG LUTEP TELANGZÜBA # 5505

MAONGKA TAJUNG MAGIRA ASHIKO TARUTSÜ
NUNGBO IBA MAONGKA MAJURUTSÜ AKOK

TAN HOPTA ATEMA - KOMA SÜLA ?

Q. Tang Nagaland nung parnoki meshiba ama, Mangkolemba, Tseminyu, Shamatore aser Tobu district tasen 4 akümtsü state government-i agizük nunga koma süla ?

Olong 20 shi nung September 03, 2021 tashi nung iba telangzuba ya onok dangi (e-mail - tiryimyim@gmail.com) :

(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzubatemi taruba Honibarnü adoktsütsü.





August 28, 2021 nü Shimla nung Bhartiya Kisan Union lenir, Rakesh Tikait leniba nung aluyimertemi aluyimba ozüing tasen asem anema longkak aita jajaba noksa nung angur.

### India nung ano coronavirus tashidak kanga putetdar

**New Delhi, Luroi/August 28 (Agencies):** India nung ano nisung 46,759 dak coronavirus putetogo, aser ibaji July 1 nungi tenzüka tang tashi nung anogo ka kija nung nisung timtiba dak iba tashidak putetba lir, ta Honibarnü Union Health Ministry-i metetdaksü. Tesüiba ghonda 24 nungsa coronavirus tashidak agi shiranger 509 süogo, aser tang tashi nung linük nung iba tashidak agi shiranger 4,37,370 süogo, ta Honibarnep 8:00 ako nung Union health ministry data

ajanga metetdaksü. India nung tang tashi nung nisung 3,26,49,947 dak coronavirus putetogo aser tang teshirangdakpurtembo 3,59,775 dang lir, aser ibaji coronavirus caseload shilem 1.10 dang lir, ta Health Ministry-isa metetdaksü. Tesüiba ghonda 24 tsüingda coronavirus agi shiranger 31,374 anep aser tang tashi nung ajak senteper 3,18,52,802 anepogo. Tang hopta shia coronavirus potitem putetba shilem 2.19 lir

saka anogo shia positive putetba shilembo 2.66 kümogo. Honibarnü Indian Council of Medical Research (ICMR)-i sangdong ka ajanga, Hokolbar tashi nung samples crore 51.68 tendangogo aser iba nungji Hokolbarnü samples 17,61,110 tendangba densema lir, ta metetdaksü. Tesüiba ghonda 24 tsüingda coronavirus vaccine dose crore ka dak tema tutsüogo aser ajak senteperbo dose crore 62.29 dak tema tutsüogo, ta sorkari metetdaksü.

### Taruba hopta Rahul Gandhi-i Chhattisgarh semdangtsü: Baghel

**New Delhi, August 28 (Agencies):** Tang Chhattisgarh Congress unit telung nung mangatetep adoka lia Honibarnü Chief Minister, Bhupesh Baghel-i, taruba hopta Rahul Gandhi-i state semdangtsü, ta metetdaksü. Delhi semdanga Rahul Gandhi den senden amenba sülen Raipur nung osangbenertem den jembidang Baghel-i, "Rahul Gandhi-i taruba hopta Chhattisgarh semdangtsü. Pai Bastar, central aser north Chhattisgarh semdanga onoki tribals, aluyimertem, tetsürtem, lanurtem aser sensakertem atema inyaksüba terenlok mapatem asadangtsü," ta metetdaksü. Hokolbarnü Delhi nung Baghel-i Rahul Gandhi'er kidang pa den senden mena liasü; kasa

senden nungji Congress general secretary, Priyanka Gandhi Vadra-a aden. Osang angazükba agi, Baghel-i Congress bangdak lenirtem dang, pa Chief Minister inyakba anema minister TS Singh Deo-i apusoaka kecha mesütetsü ta shiogo. Minister Deo pusemertemi ashiba agi, Chhattisgarh nung Chief Minister mendenji küm ana ser tasadang lemsatempa abentsü melungtepa liasü. "Chief Minister-i, Gujarat sorkar dang nungibo pa leniba nung Chhattisgarh sorkar tajungba ta shiogo. Congress party-i linük matsüingdang Chhattisgarh sorkar tatishtüsü süa jembitsü akok, ta pai shiogo. Baghel-isa, par sorkari Adivasi nung atema welfare schemes aika tenzüko go aser

yimtsüngtem rongsenkettstung ajungkettsütsü atema terenlok mapa aika inyaksüogo ta shiogo," ta kasa osang ajangasa metetdaksü. CM Baghel pusemertemisa Congress in-charge Chhattisgarh, PL Puniya aser Congress General Secretary, KC Venugopal na ajurua senden menogo. 2018 küm December ita nung Chhattisgarh assembly election nung Congress-i takok tulu ngua liasü. Taküm June ita nung Baghel-i aniba sorkar küm ana ser tasadang ajungba mapang nungi Deo pusemertemi chief minister melentepa inyaksü akhanger. Ajisüaka Baghel aser Deo napronglai party bangdak lenirtemi kechi shidir angatsü, ta shiogo.



August 28, 2021 nü Chennai nung aliba Nandanam Government Arts College nung arrshi küm 18 ser temapur kaketshirtem nem coronavirus vaccine tutsüba noksa nung angur.

### Ladakh lenirtemi MoS Defence ajuru; state jenjang akhanger

**Srinagar/New Delhi, Luroi/August 28 (Agencies):** Honibarnü Minister of State for Defence, Ajay Bhatt-i Peoples Movement for Ladakh aser Kargil Democratic Alliance of Leh nungi lenirtem ajurua senden menogo. Senden nung jembidang Bhatt-i lenirtem dang nenok takhangba onüktem atema Home Ministry-i committee ka tentetsü, ta metetdaksü. Senden nung Kargil aser Leh nungi lenirtemi nenshia Ladakh nem state jenjang agüjang, ta takhangba agütsüogo, ta lenirtemi metetdaksü.

mapang nung Minister-i, nenok takhangba onüktem atema Home Ministry-i Joint Defence Committee ka tenteta parnoki Ladakh lenirtem den jembitsü, ta metetdaksü. Kargil Democratic Alliance nung Co-Chairman, Asgar Ali Kabalai-i, Minister-i kobi melii committee ka tentetba sülen Kargil Democratic Alliance aser Peoples Movement for Ladakh nungi lenirtem den senden amentsü ta nangzükogo, ta metetdaksü. August 1, 2021 nüa Kargil aser Leh nungi lenirtemi Ladakh nem state jenjang agüjang, ta takhangba agüja liasü.

Senden nung state jenjang atema dang masü saka region kübok Kargil aser Leh nung alirtem sorkar mapa nung shimoktsü atema jembii. Parnokisa region atema Lok Sabha menden ana lemsükjang aser Ladakh nung tzu-mopung aser litsü wazüka ayutsü atema linük temzüng nung ozüing inoksemang, ta takhangba agütsü. Lenirtemi Minister den senden ghonda ana shi amenba

Hokolbarnüa Minister of State for Defence Ajay Bhatt-i anüdoklen Ladakh kübok Chushul sector nung Line of Actual Control (LAC) len security tensa asadanga liasü, iba sülen pai Leh nung Army tongti ketdangsertem ajuru. Bhatt-i anogo asemnü atema Union Territories of Ladakh aser & Jammu & Kashmir semdang.



August 28, 2021 nü Chennai Port nung Indian Navy-i India Coast Guard Ship 'Vigraha' semzükdang tangokba noksa nung angur.

### JeM kiralongrar teloki Taliban lenirtem ajuru

**New Delhi, August 28 (Agencies):** India nung intelligence agencies-i kiralongrartemi Jammu & Kashmir amaktsüa akok, ta tekümdangtsü osang ka metetdaksü. Arrtsülen nungi kiralongrartem aitogo, aser iba osangji state intelligence aser security agencies nem metetdakja lendong nokdangtsü atema renema alitsü tuyuogo, ta Honibarnü sorkar tongti ketdangser kati metetdaksü. Pakistan nung amenoka aliba kiralongrar telok- Jaish-e-Mohammed (JeM) nungi lenirtemi August ita tasembuba hopta nung Kandahar nung Taliban lenirtem ajuruogo, ta intelligene agencies nem metetdakja linük nung lendong nokdangtsü atema renema alitsü tuyu. Iba senden nungji JeM-i Taliban lenirtem dang India

nung maparen balala inyakba nung yaritsü mepishia liasü. Kasa senden nungjisa Pakistan nung yimtenren tensa atema-a o lemtepogo. Tongti ketdangserisa, "Onoki intelligence agencies dang social media nung mita repringtsü tuyuogo. Pakistan nungi kiralongrar anati Srinagar nung lendong agütsütsü sentong lir, ta August 24 nü onoki osang angazükogo. Agencies ajak dang amalitepa inyaksü aser renema alitsü atema tuyuogo," ta metetdaksü. August 15 nü Taliban teloki Afghanistan yimtiba, Kabul agiba sülen tensa tamajungba aküm aser linük aikati pei sensotem iba linük nungjagi anitetdar. Afghanistan nung bendangertem dang masü saka Afghan nungera aikati linük toktsür ajentsü atema airport anasa anenzüka lir.





Afghanistan kübok Kabul airport nung nüburtem aninba nung teyari agütsüba sülen British armed forces 16 Air Assault Brigade nungi sepaitem RAF Voyager aircraft nung Brize Norton, England tonga aoba sülen air terminal-i aoba noksa nung angur. Kabul airport ajanga nisung 100,000 dak tema takok ngua aninogo, ta US-i ashi, ajisüaka nisung meyirejang aika ano Afghanistan toktsür moteti lir.

## Taliban-i sokar meyong osettem meyiptsütsü tuyu

**Kabul, Luroi/August 28 (Ahencies):** Taliban-i, Kabul nung alir shirnoki sokar meyong gari, prangbong injang aser tanga osettsüt balala yua lir, parnok dang hopta ka tsünga item osettsüttem tapet department ket tongtsütsü tetuyuba agütsüogo, ta Taliban o tongdar Zabihullah Mujahid-i ashiba Tolo news sangdong ka ajanga metetdaksü.

Osang ajanga ashiba agi, Mujahid-i Twitter ajanga, "Kabul nung alir shirnok ket nungsa sokar meyong osettsüt, hadir, gari aser prangbong injang yua lir, nenoki pei mulungka nung item osettem hopta ka tsünga Islamic Emirate kübok tapet telen ket tongtsütsü

metetdaksür," ta ashi.

Iba masüdag Taliban-i tetsür healthcare worker ajak dang mapai meyipa arutsü metetdaksüogo, ta otongdar kati Hokolbarnü ashi. Afghan nunger tazüng tashirtem aika linük toktsür jena aoba ajanga public services nung tetsükdaksü adoker aliba mapang ka nung iba tetuyuba ya agütsüogo.

Taoba mapang tetsürtem mapa inyaksü tenokdangba agütsü aser parnok office nungia meyipa yokogo aser kasaji tanga ataloktsü ta tsübua bilemer.

Ajisüaka health system nung staff agi anünga ajanga tashishiba aika adokba sülen iba jenjang agitsüsa aküm.

"Islamic Emirate, Ministry

of Public Health-i centre aser province tem ajak nung tetsürtem pei mapai meyipa arutsü ajungshir," ta otongdar Zabihullah Mujahid-i sangdong ka ajanga metetdaksü.

"Parnok mapa nung Islamic Emirate-i kecha t e t s ü k d a k t s ü madokdaksütsü," ta paisa ashi.

August 15 nü Taliban-i Kabul amokbangba sülen tongtibang mapa balala tanaben amenokshitsü atema tetsükdaksü ajangashia arudar, kechiyong anüolen aliba linüki teyari agütsüba sokar kübok inyaka aliba specialists tem aika linük toktsür a aer rongnung densemogo mesera tetsüba agi pei ki toktsür maer.

## Philippines nung Sept 7 nü tashi tenokdangba atsülangshir

**Manila, Luroi/August 28 (Agencies):** Philippines-i coronavirus tashidak azüoktsü asoshi tenokdangba agütsür aliba maneni Metro Manila capital region aser tanga province kar nung September 7 nü tashi Honibarnü atsülangtsüogo.

Tir Rodrigo Duterte indang otongdar Harry Roque-i sangdong ka ajanga, Metro Manila maneni tenokdangba kübok toktsütsü ta ashi. Tenokdangba agütsür aliba ya August 31 nü tembangtsü liasü, saka linük nung Delta variant agi animesor tashidak kanga kara menatepyonga aoba ajanga iba jenjang agi.

Metro Manila nung shishilemba balala shilem 50 tashi lapoktettsü. Ajisüaka restaurant, tamangba yimsü dak sendakba inyakyim, personal care services, bars, beauty parlour maneni shibanga atatsü.

Capital region nung nütsünyongsük million 13 dak tema lir aser iba tesem ya Philippines nung Covid-19 tashidak poktetdak teyongtsü lir.

Kasa mapang nung province teku aser yimti trok nung senzusenpong dak sendakba nung tenokdangba tesashi agütsüogo, kong tashidak nisung aika dak potetdar.

Philippines ya tang Asia linüktem rongnung Covid-19 agi tamajungtiba kongshir aliba linük ka lir aser tang tashi nung iba linük nung nisung 1,916,461 dak tashidak potetogo aser nisung 32,841 süogo. Hokolbarnü linük nung nisung 17,447 dak tashidak potet aser shiranger 113 asüba den tashidak menar alir nisung 6,771 taneptsü ngua liasü, ta health department sangdong ka ajanga metetdaksü.

Department of health's epidemiology bureau director

Alethea De Guzman-i Brehostibarnü, linük nung tashidak menar aser asür timba küma odar ta ashiba den Metro Manila ya lendong tulu keta aliba tesem ka ta ashi. Paisa, iba tesem nung ano nisung aika dak tashidak menaba ajangshitsü ta ashi.

Hombarnü DOH-i ashiba agi, Delta variant ya capital region aser Calabarzon region nung lokti nung prokshia odar. Guzman-isa, iba variant ya linük kübok tesem 17 nung potetogo, ta ashi.

Vaccine agiba dak sendakba nung, sorkari tang tashi nung vaccine dose million 194.89 mekazükogo, koba nütsünyongsük million 100.5 nem agütsütsü asoshi teperi asütsü, ta finance ministry-i ashiba den sorkari 2022 küm January ita tashi nungbo nisung ajak nem vaccine agütsütsü, ta ashi.

## China-i Taiwan Strait nung US Navy senzusenpongba aitsü

**Beijing, Luroi/August 28 (Agencies):** China aser Taiwan na tsünga U.S. Navy warship ka aser Coast Guard cutter ka süia aoba China defense ministry-i Honibarnü aitsüogo.

Ministry indang website nung sangdong ka ajanga, iba inyakyim ya rara menatsüba inyakyim ka ta ashiba den iba ajanga Taiwan Strait nung yimjung raksatsür aser security dak sendakba nung lendong atokdaksür tongtibangji United States ta sayur, ta ashi.

"Onoki iba inyakyim anemer aser ajang ajanga aitsür," ta kasa sangdong nung shia lir.

USS Kidd guided-missile destroyer aser Coast Guard cutter Munro na Hokolbarnü international water nung senzü, ta U.S. Navy-i ashi. Iba amala inyakyim ya China amokmerenba ama reprangteter, shirnoki tawa Taiwan anasa drills ayongzüka agi aser parnok tazüokba küboki iba asetkong aitdaksütsü atema nungdakra tashiyim amshitsü, ta sangdongogo.

"Rongtem ozüng kübok Taiwan Strait adena aoba ajanga free & open Indo-Pacific ka atema US bendanga agütsür aliba sayur," ta Japan nung amenoker aliba US navy-i sangdong ka ajanga metetdaksü.

Taiwan nung nütsünyongsük million 23.6

shi lir aser iba asetkong ya 1949 küm civil war adoka Communist Party-i China amokbangba mapang pila. Taiwan den U.S. formal diplomatic tesendaktep mali saka linük yimtiba Taipei nung representative office ka amenoka lir aser Taiwan defence atema military equipment supply asür tongtibang lir.

Mangatetep adoker aliba asetkongtem anasa China nunger coast guard tem kanga bulua senzusenpongba mapang U.S. Coast Guard-a asendenshir inyaksangshidar. South aser East China Sea nung item asetkongtem ya China aser tanga sorkaria parnok meyong ta ashir.

Süklep 418 talang rong Munro koba Alameda, California nung amenoka lir, iba rong ya August ita tom nung iba tesemi aru. Iba rong ya hopta tetenzüklen Japan nunger coast guard indang rong Aso den East China Sea nung külemi training agia liasü.

U.S. aser Taiwan coast guards na tsünga March ita tenangzüktepba ka yangluba sülen iba ita sensaksem ka kaogo. China-i iba tenangzüktepba yangluba ya magizüker.

Honibarnü defense ministry sangdong ajanga ashiba agi, "Taiwan ya China nung shilem ka aser pilatsü makok, aser China-i minprong kecha magizütsü."

## US Congress-i Biden dak tai tongloksü



**Washington, Luroi/August 28 (Agencies):** US tir Joe Biden dangi shiti ka nung US Congress-i, Afghanistan nungi US sepaitem ajanga aninba ajanga iba linük nung mepetmesü tulu adok, ta shiogo.

Congress-isa, US nunger sepaitem aser Afghan nunger partner tem Afghanistan nungi kanga menoa maninba ashishiogo. Parnokisa Taliban den tesendaktep yanglua China-i parnok jenjang yanglushitsü meranger ta ashi.

Taliban yimsütsüba kübok tetsürtem tajemzükba tia nung toktsütsü aser lokti tentetba balala amokseptsi, ta Congress-i, ashi. Shiti nungsa America tejak dangi anir aotsü atema Biden indang sentong dak sendakba nung tasüngdangba 14 asüngdanga liasü.

Brehostibarnü Kabul nung US sepai 12 poksetba den 15

yiruba sülen taoba tir Donald Trump aser Republican MP temi Democratic tir Joe Biden kanga mejungi aitsüogo.

Afghanistan nung mepetmesü adoker aliba achaayangba dak sendakba nung Trump-i Biden aija arudar aser Brehostibarnü Kabul nung pei temang nung bomb alenoker pokdaksürtemi lendong adokdaksüba ya kanga takoksa tulu, koba azüokteter lia, ta ashi.

House of Representatives nung Republican minority lenir-i Democratic speaker Nancy Pelosi dang Afghanistan nung tensa kanga mejungi kümyonga oya aliba indang sensak asemtsü atema chamber ayongzüktsü mepeshia asüngdangogo. "Nisung taküm kümzüktsü atema Congress-i takaratiba nung inyaksangshitsü mapang lir," ta Representative Kevin McCarthy-i ashi.



# Dorians Society-i 'Nature-Fitness Walk 2021' ayongzük



Dimapur, Luroi/August 28, 2021: Dorians Society-i ayongba 'Nature-Fitness Walk 2021' sentong nung shilem agirtem tangokba noksa ka yangi ankur.

**Dimapur, Luroi/August 28, 2021 (TYO):** Fit India Movement mapatong shilem ama, Honibarnü (28.08.2021) Dorians Society, Dimapur-i 'Nature-Fitness Walk 2021' ayongzükka liasü. Impact Ministry aser Dimapur District Basketball Association den Dorians Society longjemer Dimapur kübok kilometer 18 shi ayimjema 'non-competitive

fitness walk' ayonga agiogo, ta sangdong ajanga metetdaksü. Kohima aser Dimapur nungi tanurtem densema nisung 46 agi iba sentong nung shilem agiogo. Iba mapang, shilem agirtemi Clock Tower lemjem nungi hockey ground, Nagaland Police Complex, Chümoukedima tashi jaja liasü. Iba walk nung shilem agir rongnung Kohima nungi arishi küm 11 tain Jongari Jamir

tanubusang aser tambusangji Dimapur nungi arishi küm 50 tain ka liasü.

Dorians Society nung züngsem Wapong Longkumeri, anogoshia pei temang anepaluba inyakyim balala aser saisapong ajanga nüburtem dang temang anema aser tashiita aliba indang osang lemsatepsü nükjidong nung iba fitness walkathon ayongzük, ta ashi.

Sangküm (2022) Dorians Society pur küm 25buba nung ayaoktsü aser Society-i benjongmung (Silver Jubilee) sentong ayongzüktsü asoshi asalentong yangludat, ta pai metetdaksü.

Maneni, Covid-19 dak sendakba tetuyubatem nung anidaka aser district administration den Nagaland Police Complex tekolakpur temelaba agir sülen, iba Nature-Fitness Walk 2021 ayongzük, ta kasa sangdong nung shia lir.

# Patkai Christian College mesemtetsang... (Tapak 2 nungi...)

Iba kasa sentong nung tepela o ka ashidang, Rev.Dr.T.A. Shishaki kü taküm nung takokji Patkai Christian College nung züngtetertem ya lir. Tanübo ni' parnok alima ajaklen mapa tapu balala inyaka ankur aser ajurur. Ano, talisa Patkai nung azüngertemiang kü taküm otsü zülutsüba ya meimlaba tepelatsü mapa ka lir ta metetdaksü. Iba den külemi Margaret Anne Shishak-ia kaketshirtem dang pelaba shisem. T.A.Shishak ya tan August 31 nü arishi küm 90 ajungtsü aser Margaret ya November 25 nü arishi küm 80 ajungtsü. Tenaprongla temang kanga junga lir.

Margaret ya Washington D.C nung November 25, 1941 nü asoba Tsüngrem metetba aser kongki tapu aika atemba aser ken atenba nung mongin tesayur Americatsür ka lir. Tanü iba osangbeneri T.A.Shishak dang Patkai Christian College kibur ya shiba

asütsü ta asüngdangdang, " ya asenok ajak meyong, ibai Nagaland Baptist Church Council aser Manipur Baptist Convention na temoatsü nung tenzük, anungji parnok kibur," ta langzü.

Süra na iba lima nungi pilar külena nai tenzükba College ya komaka aotsü amai bilemer ta asüngdangdang, " tangbo imlaba ama junga bener maor, saka Naga nunger ajak ajangzüktsüsa tajungba küma aotsü imlar," ta paisa langzü.

Mapang kabo Naga yimten otsü nung pa tebilemba lemsatepba atema, par kini pa par kin nungi jentok, anungji koma bilemer ta metetnua asüngdang dang, " parnoki kechi inyakar memeteti inyak, anungji nibo mejanshir, Tsüngremi dang taidokangma," ta dang langzü.

T.A.Shisak ya Manipur state kübok Ukhrul district nung Myanmar tsütsü aliba Shangshak yimer lir. Pa par

yimtak class VI tashi zünger, Christian High School, Jorhat nung high school azüng. Iba mapang amognü anepdang shia pa tenla ki aokisa ao, idangji pa anepdang yakta oaka teti nisung ka pa dang nungi tama orr tenla kidangji temekok agi tsüketa apudaker sarasademasa liasü. Iba nisungji Rev.Riküm liasü. Pa ajanga Ao limai tanüla asentenshi tulu Tsüngremi yok, ta iba kakat nung shisema lir.

T.A.Shishak ya Northern Baptist Theological Seminary nung 1961 küm BD renem aser Judson Baptist Church, Oak Park, Illinois nung ordain asüba Tsüngrem nisung ka lir. Pa Ph.D State Univeristy of New York, Buffalo nung renemer aruagi 1974 küm Patkai Christian College ya arem lepboka mesemtet. Iba college li ya Chümoukedima aser Seithekema nunger li tasazük acre 1000 nung lapoka lir.

# Kohima nung Smoke Free District Hq... (Tapak 2 nungi...)

Lai züngsemtem dang moko achir maliba yimti ka kümdaktsütsü asoshi restaurant, office aser nüburtemi amshiba tesemtem nung ozüng alema moko achiba jangjateta ozüng amshitsü ayongzükka liasü.

Kohima ya moko mamshiba yimti ka kümdaktsütsü asoshi sorkar indang agency kisüng masü saka yimtsüngtem, NGO, Police aser kija shiai shilem agitsü nüngdaker, ta lai ashi. District Nodal Officer

(NTCP), Dr. Arenla Walling ajanga District Tobacco Control Cell-i inyakba mapatem lemsatepa liasü.

Sentong nung Dr. C. Tetseo, Joint Director (Dental) State Nodal Officer ajanga Mezoma aser Dzuleke yimtsüng ya 'Tobacco Free Village' ta sangdonga liasü.

Taoba senden nung lemtetba bangzüng tanaben lepa reprangshiba mapang Dr. C. Tetseo-i züngsemtem dang

nüburtemi amshiba tesemtem nung ozüng alema moko achiba mittsü asoshi surveillance camera inoktsüla, ta ashi.

Iba sülen Smoke Free District Headquarter Campaign dak sendakba onük balala aser district nung moko ajanga temang nung timtem agütsüba angatetdaksütsü asoshi campaign agitsü atema jemba liasü. Sentong nung Deputy Commissioner, Kohima, Gregory Thejawelie menden liasü.



Dimapur, Luroi/August 28, 2021: "Swarnim Vijay Varsh" benjongmung shilem ama, Honibarnü (28.08.2021), HQ IGAR (North) kübok Dimapur Battalion - Assam Rifles-i Dimapur District nung Air Force aser Army Wing NCC Cadet tem atema rara dang amshiba prangbong aser injang tem sayaba sentong ka ayongzükka liasü. Security Force ajanga ayongba sentong nung Air Force aser Army Wing nungi NCC Cadet 125 aser Rangapahar Military Station (RMS) nung alir kibongtem aruagi denogo.

# Mulungnen O

**Kibubai alima mapatem nungi obala nem anisüngzük agütsüogo. II Samuel7:1**

Obala, Asür **Nükentoba Lemtor**, akümüli wadang ajungbena tembanga aruba mapang, temeimertem shirnokisa lenla balala ajak nungi ozü kinungertem den tamang sarasademi anir nübu, rongsen aser shisatsü agi nungita yaritepogo, ajak dang kangasa pelaba lemsateper.

Nenok mapatem ajak asoshi Tebu Tsüngremi maneni moajangma.

Oba, na onok mulungjang nung teti alitsü.

**Temeim Kinungtsü, Chirnur, Semchirtem aser Kinungertem**



**Tasoba Anogo:**

**01/04/1927**

**Tasüba Anogo:**

**21/08/2021**

# MESÜ-LIM ANISÜNGZÜKDAKI OGO

**Asür Imkongliba Longchar** (Yimjenkimong) pa ita ishika shiranga aliba mapang nungi tasünü 23/08/2021 tashi kija, kibong aser lokti balala kwikati temeim nung aria bilema sarasadem, rongsen aser nübu agi onok den yaritepogo nenok ajak dang kangasa pelaba lemsateper.

**Ano talisa :**

- Pastor CABA
- Ghoupa Fellowship (CABA)
- Ghokha Baptist Church Church Youth Ministry, dang kangasa pelaba shisemer.

Teyanglur Tsüngremi Pa temeim akhüm tulu kübok nenok ajak moajang.

**~ Teyi, Tenu nungertem aser Kinungertem.**



# SAMAR BUSHIR

PROVISIONAL LAND PATTA

Patta No: 975, at Aoyimkum village

Shri. Aochuba Aier S/o. Mejatangba of Longpa village

Tesazük : 150 x 80 ft.

# KOMA SÜLA TELANGZÜBA

(Maneni tapak 6 nungi...)

1. Asen Ao kin sobaliba Kanga tasungtet asunung, kidong lembora yimtak nungi meindoker aser mashi yimdaki marudaktsür nung, Tetsür o Tetsür aser Tebur o tebur kibong kuma, arogo nung zungsem ku agizuka ayutsüji kini tamakoktsü asütsü.

2. LEVI 18:22. nung yamai shia lir "Tebur shingai tebur den memedemtsüla; ibaji Tsüngremi sempar." Tsüngremi sembaba yimya benshia kibong kuma alitsü, Tsüngremer arogoibo magizuktetsü. **~ WhatsApp**

Tetsür o tetsür na aser tebur o tebur na kibong ka küma aliba ya parnoka asaa inyaker masü saka teyangluba nung langka mabensa(deformity) ajanga yamai inyaker.Asen sobaliba nung otsüla oboula nunger mapang nungi ya ataloka maru südi ta pilemer, aser yongji asen lokti den khenyongi mapet.Anungji tangsa tangbo parnok ya Arogo aser yamala lokti nung mamshi-i ataba tajungba asütsü südi. **~ WhatsApp**

Tsüngremi temulungjang Tang agir ta asuba nung ajemdaker inyaker asütsü akok asenok ajaki meteta lir aier asangurtem kidonga ta meteta yur Kum aika kazur kodang kibong kumti ta sudir tena rongnung ka kidong melener kibong kumadoker aser itemjia arogo aika nung department nung shimoka inyakkaktsür surapangla tetsür o tetsür aser tebur o tebur na aliba kibongjia Kar e bo junga bilemer asu? Tatsüba Aki ibala kibongjia asenok Baptist tamangba den khenyongi memeyoktepsüla . **- N.S Jamir.**

Alima nung arogoji temeshi sapang ka, Tsüngremi alima nung tebur,tetsür alitsü yanglu, Meimchirtemi Tsüngrem anema tapu ayika ali pokli nungi temenen inyaka aru aser ano inyaka aotsü Saka arogo sapangibo Tsüngremi melungpa ama alitsüla, alima sulen manitaktsüla. **-A.MOA PONGEN.KMA**

Arogopuri Tsüngrem amanga amanga Laishiba aitsür asütsü atiii,kechiba sura Laishibai tetsür ka aser tebur alitsüba atema dang shia lir.anungji Tsüngremi meyimlaba aser memelababo khenyongi meyinyaktsüla ta nibo bilemer. **~ WhatsApp**

Yamaji asunungbo sati kuli mangur aser nuktapangdar Arogo nungi tenung endoktsü nungdak madoker. Sura Arogoji temeshi ta koda ajatsü. Tanu putu sosem-tangsem uluraba agi ka anaban ka asemben razuktema liteper tang-ashi, akhi oboula nunger sayo o aser tsürabur mapang tashi nung asem-pen-ben jakzuk semnurtem- angsa litepa aru. Kasa atsü-abong apuanitemji parnoki-ang Tsüngrem bushitetra, kodak-ah atongtsü. Tesayurtem, shirnoki foreigner atishia kanga jembir, parnokji tekeraba nung sodi meshiteper asen Lima toktsür foreign Limaji oa sadem-sadema jemba alitsüla, kechiasur foreigner aser Naga nunger kodanga kasa masu. Anungji tia makai yimmaker kupoki ia ola madoktet alitsüla majurura, parnokji Arogo nung zumgsem mekumdaktsü tajungba asütsü ta bilemer. **- C.R.Pongen, NUV Dimapur.**



# GAMMA Asian MMA Championships 2021: India-i gold medal 4 densema medal 22 angu

**Luroi/August 28, 2021 (Agencies):** Cholpon Ata, Kyrgyzstan kübok ayongba GAMMA Asian MMA Championships 2021 asayamung nung, India team-i gold medal 4 densema medal 22 angu aser iba asayamung nung Kazakhstan aser Kyrgyzstan sülen India team tasembuba jenjang nung tembangogo.

Honibarnü, India atema Kishor BK (AIMMAF)-i mezüing gold medal angu. 115 LBS Striking MMA category nung, Kishor-i Kazakhstan nung Alikhan Tolegenov madak takok angu.

Ano, tetsür 115 LBS Striking MMA final nung India tsür Akshata Khadtare (GAMMAI)-i Kazakhstan tsür Tomiris Zhussupova den asaya, saka tetendangertem (judges) telemtetba nung Tomiris-i asaya koka gold medal angu aser Akshata nem Silver Medal agütsü.

Tetsür 125 LBS Striking MMA final tetoktepba nung Harpreet Kaur (GAMMAI)-i Kazakhstan tsür Rauzan Muratov madak takok ngur sülen, India atema lai tanabuba Gold Medal angu. Tetsür 155 LBS Striking MMA final nung, India tenüing nungi shilem agir Naga tsür Neitso Angami (GAMMAI)-i Kazakhstan tsür Nurtaza Jumakhanova makokba ajanga lai Silver Medal angu. Neitso-i round ana tashi koka final tongtet.

Tetsür 125 LBS MMA final nunga India tsür Harpreet-i teimla tulu yur kanga meranga asaya, saka lai Kyrgyzstan tsür Akbalieva Begaiym makok yong silver medal angu. Iba asayamung nung Harpreet-i

medal ana angur asütsü. Tebur 125 LBS Striking category nung Naorem Dinesh aser Kazakhstan nung Yermakhan Oryntayev na asaya liasü. Round tasembuba indang tanabuba half tashi Dinesh-i asaya amokbanga liasü, saka Oryntayev-i iba asaya kokteta gold medal angu.

170 LBS ELITE M Striking MMA tebur final tetoktepba nung, India tenüing nungi Naga nung Longtsukumba Ao aser Palestine nung Yazan Jaber na round asem tashi asaya liasü. Round asempronlga nung Ao-i kanga dang meranga Yazan den toktepa asaya, saka tetendangertem Yazan nem takok agütsü. Kasa tetoktepba

nung, Longtsukumba-i silver medal angu.

India nung Sumit Bhyan aser Samata Sonavane napronglai pei pei tata asaya nung silver medal ana angu. Kasa mapang, 105 LBS MMA Category final nung Akshata Khadtare-i India atema gold medal tasembuba ngua liasü.

Maneni, 125 LBS Category final nung, Dinesh Naorem-i Kyrgyzstan nung Uson Murzabek madak takok anguba mapang, pai medal tanabuba aser India atema gold medal pezübuba bendenloktsü.

Iba asayamung nung, India team-i Gold Medal 4, Silver Medal 7 aser Bronze Medal 11 nguogo.

## \* GAMMA Asian Championships nung India atema medal angurtem:

- \* A01 - 52,2 KG | - 115 LBS ELITE M Havish Reddy (GAMMAI) - Bronze Medal
- \* A02 - 56,7 KG | - 125 LBS ELITE M Arsenba Ozukum (GAMMAI) - Bronze Medal
- \* Dinesh Naorem (AIMMAF) - Gold Medal
- \* A03 - 61,2 KG | - 135 LBS ELITE M Aaqub Javid (GAMMAI) - Bronze Medal
- \* A05 - 70,3 KG | - 155 LBS ELITE M Sumit Bhyan (GAMMAI) - Silver Medal
- \* A07 - 83,9 KG | - 185 LBS ELITE M Anurag Singh (GAMMAI) - Bronze Medal
- \* A10 - 47,6 KG | - 105 LBS ELITE F Akshata Khadtare (GAMMAI) - Gold Medal
- \* A11 - 52,2 KG | - 115 LBS ELITE F Samata Sonavane (GAMMAI) - Silver Medal
- \* A12 - 56,7 KG | - 125 LBS ELITE F Sanika Patil (GAMMAI) - Bronze Medal
- \* Harpreet Kaur (GAMMAI) - Silver Medal
- \* B01 - 52,2 KG | - 115 LBS ELITE M STRIKING MMA Jowkhum Dili (GAMMAI) - Bronze Medal
- \* Kishor B Kumar (AIMMAF) - Gold Medal
- \* B02 - 56,7 KG | - 125 LBS ELITE M STRIKING MMA Vishnu Warriar (GAMMAI) - Bronze Medal
- \* Dinesh Naorem (AIMMAF) - Silver Medal
- \* B05 - 70,3 KG | - 155 LBS ELITE M STRIKING MMA Shammass Latheef (AIMMAF) - Bronze Medal
- \* Neitso Angami (GAMMAI) - Silver Medal
- \* B06 - 77,1 KG | - 170 LBS ELITE M STRIKING MMA Longtsukumba Ao (GAMMAI) - Silver Medal
- \* B07 - 83,9 KG | - 185 LBS ELITE M STRIKING MMA Sahil Dahiya (GAMMAI) - Bronze Medal
- \* B11 - 52,2 KG | - 115 LBS ELITE F STRIKING MMA Akshata Khadtare (GAMMAI) - Silver Medal
- \* Samata Sonavane (GAMMAI) - Bronze Medal
- \* B12 - 56,7 KG | - 125 LBS ELITE F STRIKING MMA Sanika Patil (GAMMAI) - Bronze Medal
- \* Harpreet Kaur (GAMMAI) - Gold Medal

## Junior World Championships nung Manu Bhaker-i shilem agitsü



**Pune, Luroi/August 28, 2021 (Agencies):** India tsür Shooter Manu Bhaker, shibai Tokyo Olympics nung shilem agia liasü, aruya aliba Junior World Championships asayamung nung asayatsü terenemba lir. Tawa tembangba

Tokyo Games nung, Manu-i medal menguteti tembang.

Arishi küm 19 tain Manu, shibai 2018 küm Junior Shooting asayamung ka nung tesüsa asayaogo, taruba ita September 29 nungi Lima, Peru nung asayatsü aliba ISSF Junior

World Championships nung shilem agitsü asoshi la shimogo.

Iba asayamung atema tetoktepba pungo - 10m air pistol, 25m sports pistol aser 10m air pistol mixed, 10m women's team aser 25m women's team nung asayatsü asoshi Manu shimogo.

10m temeyoktep tarep nung Manu-i külem India nung Sarabjot Singh den asayatsü.

Shotgun (trap) nung, India tenüing nungi Shapath Bhardwaj-i trap' asayamung nung tokteptsü. 2017 küm Junior World Cup - double trap tetoktepba nung Shapath-i bronze medal takok angu.

Olympics nung, double trap asaya agienba sülen, Shapath-i mezüing international asayamung nung shilem agitsü terenemba lir.

## CPL nung Russell-i otsü tasen ka yangluogo



**Luroi/August 28, 2021 (Agencies):** Warner Park kübok tang asaya aliba Caribbean Premier League (CPL) nung, Jamaica Tallawahs puri run 120 agi Saint Lucia Kings pur kokogo.

Hokolbarnü, telok ana tsüingda asayaba mapang, Jamaica Tallawahs puri run aikati iba asaya akokba den külemi, CPL putiotsü nung otsüsütsüsa, Andre Russell-i ball 14 nung run 50 yangluteta liasü.

Iba T20 asaya nung Jamaica Tallawahs puri run 256 yanglu liasü, saka Kings puri Jamaica den meneptepa asayatsü asoshi parnoki mekoktet.

Toss koka Kings puri bowling asütsü shim aser asaya tenzüka Tallawahs atema Kennar Lewis-i kara kara dang ball 22 nung 6' pungo densem run 48 yanglutet.

Lewis den külem asayar Chadwick Walton-ia team atema run bendenloktsü. Aji masüadang, Roston Chase-i Lewis out süja liasü. Iba sülen, tatsüka dang lir Walton-a run 47 nung out süadok, saka Tallawahs atema Haider Ali aser Rovman Powell nati ball melalui run tem bendenlokja

asaya.

Ano, Jamaica Tallawahs atema Andre Russell-i run aika bendenloktsü aser pa indang strike rate 357.14 shi liasü. Kings puri run magütsütsü asoshi asaya azüoktsü merandang, saka Kings pur bowling nung Russell-i taochi mesayui züklokja asaya.

Tanabuba innings nung, Kings atema Rahkeem Cornwall-i junga asaya tenzü, saka pa den külemi Kings pur batsman tem kara kara dang out süadok.

Mezüing over nung Kings nungi Cornwall aser Faf du Plessis naprongla atonga out süadok aser PowerPlay tatemlen parnok run 66 nung wicket 6 tukadokba ajanga takok angutsü teimla makai kümadok.

Tallawahs atema bowling tsütsü Migael Pretorius-i shilem tajung agi. Tanabuba innings nung pai wicket pezü out sütsü (4/32). Taküm Caribbean Premier League nung pai mezüing shilem agir asütsü.

Saint Lucia Kings atema, Tim David-i ball 28 nung run 56 yanglua liasü. Kings pur run 135 nung ajak out süadok.

## Tokyo Paralympics: Bhavina Patel final-i iogo

**Tokyo, Luroi/August 29, 2021 (Agencies):** Honibarnü, Tokyo Paralympics - women's table tennis singles Class 4' semi final asaya nung, otsüsütsüsa India tsür Bhavina Patel-i world no. 3 China tsür Zhang Miao madak takok ngua final tongtetogo.

Paralympics table tennis final tongteter India nung table tennis asayar (para-athlete) rongnung Bhavina mezüing kümogo.

Iba asaya nung game pungo nungi Bhavina-i mezüingbuba (7-11) aser pezübuba (9-11) set makokba dak alaka, lai set asem shi takok angu. Final tongtettsü atema Bhavina-i 7-11, 11-7, 11-4, 9-11, 11-8 Zhang Miao tsükdaktsü.

Deobarnü gold medal match atema Bhavina-i ano China tsür Ying Zhou den asayatsü terenemba lir.

Semi final tongtettsü atema, Hokolbarnü arishi küm 34 tain Bhavina-i world no. 5 Serbia tsür Borislava Peric Rankovic madak 11-5, 11-6, 11-7 agi takok angu.

Asayamung tetenzüklen, round of 16 nung Bhavina-i 12-10 13-11, 11-6 agi Brazil tsür Joyce de Oliveira tsükdaktsür sülen quarter final tongtet. Iba mapang, Paralympics table tennis asayamung quarter final tongteter India para-athlete rongnung Bhavina-i mezüing aküm.

Class 4 category nung teka arazüktteta aser mener asayateter Athlete tem shilem agir.

"India nung teyari ajanga semi-final tashi takok ngua asayaogo. Final nunga takok angutsü asoshi nenok teyari maneni nüngdaker," ta semi-final asayar sülen Bhavina-i ashi.

## BILEMDANGANG

"Konang asüyonga maksü asüyonga mimbangtsü makoker."